



Ds nöje Mühlebärger Lied

Text: Hans Jürg Zingg

Melodie: Volkslied

Begleitmusik: Roland Scherrer/Christian Schwander

's isch äbe dr mönsch uf ärde
Mühlebärg
's isch äbe dr mönsch uf ärde
Tschernobyl
u dr geisschäs im Bergell u d fische im Tessin
u d rentier vo de Lappe - alles ist hin
's isch äbe dr mönsch uf ärde
u dä bruucht u dä bruucht energie

's isch äben e mönsch im wärde
Mühlebärg
's isch äben e mönsch im wärde
Tschernobyl
u di angscht vor mueter wäg dr miuch dr luft wäg dr choscht
u d eifaut vor staatleche strahleposcht
's isch äben e mönsch im wärde
wo gsung gebore wett sy

u dr härd i üsem garte
Mühlebärg
u dr härd i üsem garte
Tschernobyl
vo cäsium jod u strontium
u vilicht ou no chlei vo plutonium
dr härd i üsem garte
isch chrank isch chrank für lang

[u dunden a der Aare
Mühlebärg
u wyt wyt änen am Dnjepr
Tschernobyl
öb scho itz e ruine oder ersch i **füfzä** jahr
si blybe so wi so für jahrhundert i e gfahr
u dunden a der Aare
da steits u louft nüm lang] ¹

es git für üs zwe wäge
Mühlebärg
es git für üs zwe wäge
Tschernobyl
oder dä vo sunne- wind- u wasserchraft
u vom gsetz wo vii me gründ zum stromspare schafft
es git für üs zwe wäge
dä vom ja u dä vom nei

dä vom ja füehrt zum atomstaat
Mühlebärg
dä vom ja füehrt zum atomstaat
Tschernobyl
u mit au jahr me strom wi's d wirtschaft gärn wott
geng wi grösser d frag wohi mit däm tödleche schrott
dä vom ja dä wo chrank macht isch bequemer
NEI isch müehsam aber NEI macht frei

(enstanden Juli 1986)

¹ Im Interesse einer Konzentration der Liedaussage wurde diese Strophe für die Bühnenversion weggelassen. Politisch wäre der Satz gerade heute (Februar 2011) von besonderer Aktualität!